

Na Kolegio Ehekutivo di Entidat Públiko Boneiru
Parke Wilhelmina #1
Kralendijk
Bonaire C.N

Frakshon Coffie
Konseho Insular Bonaire

Pasangrahan
Parke Wilhelmina 2
Kralendijk
Bonaire, C.N.

Persona di kontakto:

Désirée Coffie
Miembro di Konseho Insular

T: 715 5330 tst. 1414
frakshoncoffie2020@gmail.com

Fecha:

8 di mart 2022

Tópiko:

Rontònde Kaya Amsterdam,
Kaminda Djabou 8/3/2022

Referensia:

FC2022007

Apresiabel Kolegio,

Un di e fundeshinan di bon gobernashon ta transparensia i tambe responsabilisashon di gobernantenan pa ku nan maneho, desishon ku nan ta tuma. Especialmente esaki ta importante i nesario ora ta trata maneho i desishonnan ku ta tuma riba e medionan finansiero limitá ku nos komunidad ta produsí pagando belasting i otro obligashonnan finansiero pa kaha di gobièrnu.

Kolegio Ehekutivo ta enkargá ku ehekushon di nos infrastruktura, spesífikamente nos kareteranan. Ta bon konosí den ki mal estado di mantenshon nos kareteranan eksistente ta, sin menshoná e falta enorme di kareteranan nobo den barionan nobo kreá. E situashon aki ta unu ku tin nos komunidad kansá i fadá.

Na luna di desèmber 2020 ku hopi publisidat, diputado James Kroon a anunsiá ku e rotònde na Kaya Amsterdam/Kaminda Djabou a keda kla i ku pa fin di yanüari 2021 lo tin apertura ofisial despues ku pone e último kapa riba e rotònde.

Komunidad alertá a bin tuma nota ku e rotònde tabata muchu chikí pa por fasilitá trùknan grandi i kònteinernan pa usa e rotònde. Un diskushon públiko intensivo tabata e konsekuensia di e anuncio aki ku a bin resultá ku e arkitekto, esnan enkargá ku e supervishon di e konstrukshon i e direktor nobo di DR&O mester a yega na e konklushon ku a mishi ku e pintura original kambiando esaki supstansialmente, a duna òrdu pa pinta un rotònde nobo ku dimenshonnan i midínan supstansialmente diferente i mas chikí ku esun original.

Konsekuensia tabata ku a ordená pa para e konstrukshon di e rotònde i pa likidá esaki, destruyendo asina un kapital –manera a informa pueblo durante un rueda di prensa i nos den un reunion di Konseho Insular- entre 600 pa 800 mil dòler.

Na e mesun momento a anunsia ku lo (laga) hasi un investigashon atministrativo i tékniko pa asina determiná na unda kosnan a bai robes i ken ta responsabel pa esakinan.

Awe nos ta na 8 di mart, kual ta 11 luna mas aleu. Te awe komunidad, i tampoko Konseho Insular den representashon di e komunidad, no a risibí resultado(nan) di e investigashon. Esaki mi ta konsiderá no solamente violashon di prinsipionan di bon gobernashon, pero pió ainda un falta total di respèt pa e pagadó di belasting i pa su representantenan. Un investigashon durando ya 11 luna, miéntras komunidad ta buska klaridat. Pa tal rason, hasiendo uso di artíkulo 45 di Reglamentu di Órden, mi ta hasi e siguiente preguntanan:

1. Ken a duna òrdu pa desviá for di e pintura original? Ken a duna òrdu pa pinta un rotònde nobo di dimenshonnan muchu mas chikí ku esun original? Ken a duna òrdu pa BMW ehekutá e rotònde den su forma nobo pero mas chikí?

E di dos pregunta ku e investigashon lo mester a trese klaridat riba dje ta:

2. Kuantu e daño finansiero ta i ken ta responsabel pa e daño aki i kiko gobièrnu ta hasi pa kobra esun(nan) ku a okashoná e daño finansiero aki?

Huntu ku komunidad mi ta di opinion ku no tin ningun motibu bálido pa hustifiká ku te ainda e investigashon no a konkluí. E úniko motibu ta ku ta parse ku kueste loke kueste ke tapa e suseso bergonsoso aki pa protehá esnan ku realmente a kousa e situashon lamentabel aki ku fondonan di pueblo. Pueblo ke sa ken ta esnan ku a okashoná e vupá aki i ki sanshon ta bai tuma.

Mi ta spera di por haña kontesta verbal riba e preguntanan aki den e próksimo reunion públiko di Konseho Insular.

Atentamente,



Désirée E. Coffie

Miembro di Konseho Insular Boneiru